

Dumahîk: Guhartinên mezin

Zarzimanê wan di riya dezgehên wan ên raghandinî yên rengîn û pir alî re , bi herhawî dikin ku rûyê hêz û kesayetiyên nerazî û rikebir reş derîne û bêje – xwedê giravî – ev xwepêşandan , çi li vir û çi li wir , karê nokerên hêz û dewletên biyanî ye !. Lê , bûyerên heyî , rastiyên berçav digel gelek rapor , dîmen û wêneyan , didine xuyakirin ku , ew hêz û cemawerên xwepêşandanan , ne ajan û noker in , ne jî şet û bêhiş in , an terorîst û xwînrej in ... Ew mirovhez , dilsoz , dilgerim û hişyar in , heyranê milletên xwe ne , xwedî doz û daxwazên dadmend û rewa ne , bi şeweyên aşkere û aştiyane dengê xwe li beramber malxurî û setemkariyê hildidin û dibine ciyê rêzgirtin û hezkirina gelên xwe .

Hêjayî gotinê ye ku , di pêkanîna van çalakî û guhartinan de , xwediyên rola herî li pêş û berçav , nûhatî , xortên zana û nifşên nû ne , ewên dilgerim , sernerim , xwedî hêvî , jîr û jêhatî û bi Entirnêtê baş fêm dikin û karin li destên xwe bigerînin da bi hev re têkildarbin û bibine hêz .

Li hêla dî jî , ew guhartinên mezin , pîroz û serkeftî yên ku li Tûnis û Misirê cîbecî bûne û li cîgehên dî jî dibin , didine zanîn û xuyakirin ku , rewşên hundirî , pirsên xizanî û bêkariyê , pirsên demokrasî , rûmet û mafên mirovan , jêder û bingeha guhartinan ne , û çendî hêz , partî û tevgerên siyasî serbixwe û welatparêz bin , ne li gor siyaseta berjewendiyên derve bin , û biryarên wan hêz û partiyan di destên wan de bin , ewqas , dê serfiraz û serkeftî bin .

Pirsgirêkên welatên Ereba û Rojhilata navîn bi tevahî , Sûriyê jî di nav de , cîbecîkirina alfebeya demokrasiyê , rêzgirtina mafên mirovan , çareserkirina pirsên bêkarî û perîşaniyê ye , pirsên azadiya

peyvê û wekhevîyê ye .

Di gavavêtin û serkeftina çareserkirina van pirsên de , pirsên gelê Kurd jî ciyê xwe yê rast dê bibîne û çê nabe jê bête cudakirin . Hê jî gelek hene naxwazin bawer bikin , ku dem hatiye guhartin , û bi darê zorê , bi girtin û lêdanê , bi kuştin û xwînrijandinê , bi tang û topan û şerxweziyê , girêk û astengî bêtir dibin , nexweşî , derd û kul , kîn û keder kûrtir dibin , rê li ber aştî û diyalogê dixetime û tê girtin .

Heleb 22.02.2011

*** Sekretêrê Parta Yekîtiya Demokratîk a Kurd li Sûriyê .**

M. Şêx Allî

Dumahîk: Sûriya û Bahoza.

Ji bilî ew rastiyên tehil , gelek pirs û pirsgirêkên mezin û qeyranbar jî hene , ew jî li dirêjîya dehsalan dimixmixin , û mîna terafa dibin ariyê de ne û destlatê derî li ser kilît kiriye. Wek mînak: Pirsên netewan , pirsgirêkên bineolî , pirsên windabûyan , gendele , dizîna dahatûyên dewletê... û H.W.D. Bêguman , ew pirsên jî radeya tengijîna civakî bilind dikin û heyamên tirsdar û bargiran di demên nêzîk de gengaz dikin.

Di van rewşan de , çavên her mirovekî Sûrî ji hemî nof , netew , ol û qadan li destlatê ne , ew bi hêvî ne ku wê çavên xwe baş vekiribe , li dedora xwe baş dinêre , rewşan baş dixwîne û dinirxîne û dersan jî bi nêrînên erênî û bi welatperwerî jê werbigre.

Ji ber ku ne tenê gelê Sûrî , lê belê dost û dijmin jî dibêjin: Zor pêwîst e ku destlata Sûrî rojekê pêşde dest bi guhartinên bingeîn di hemî warên sazûmanê de bike , li serê wan guhartinan û mîna gaveke destpêk , zagona awarte ku ji pêncî salî ve li dar e , were hilanîn , hemî alavên ragihandinê werin azadkirin û rola dezgehên asayîşî jî di rêvebirina dewletê û jiyana mirov de were bendkirin.